

№ 43 (1294) Ай тахайт потты 25 хатд 2025 тад

Рут мувдада касаддат

Сус пора. Айн-айн турмев тал педа кердаты питас. Хоятат ищи тал удапсая дэщатыты питсат. Вудэң ёх дуң удты хотводдал эдты рут мувдала касалдат, тащдал тал щахардала вошталдал.

Кеван донщ питас тащ ёх вудэң ухда, донщхопа дэдсат. Онасдад дуң хуват яма войн катдам хоптыйн кирсаддад. Там ванан МСП «Мужевское» нядмет тащан рупитты ху Эдуард Лонгортов айкед верас: «Там сус толах ар ус, вудыдув толах юпийн хухадсат. Щишан иса мосас вантман





Римма Васильевна Пырысева осам тахар верад.

тайты. Туп патлама атат йиты питсат, мохты кат хоятан ат давадты питсув. Оха манты вудыдув сыйң сохадан, дуңханщапан ярсаддув. Муң ин Саран муван уддув. Тащев аядта Кев ова воштасэв. Мосванан тата еша вотас ус, донщ питас. Щадта мелак турам ёхтас, кера, еңка йис. Щишан вудыдува даварт дэтот хирты».

Хоты ин тащ хотаң нэңат вердад мандат, МСП «Мужевское» оданмет тащан

рупитты нэ Римма Пырысева ястас: «Муң сусэв яма манас. Ёнтасты ураңан нёплув, молщан пон лэщатсам, таталтсам. Ма нёхи соралтсам па саңхартсам, тала сопасласам. Вай илам торн сухатсам, тахар версам. Там тылащан касалты питсув. Донщ хуват манты кен, Кев сора вуншлэв. Донщ арашак ки йил, холна ямшак питал. Ин хой тахайн вулылува ухал талты вольк. Тал улты мувлува Ас потты тылащ холатыйн велщи ёхатлув».

Вудэң мохет яма ат касаддат, тумтака рут мувдада ат ёхатдат, войдад аратэдан тад хотводдада ат воштаддад.

Валентина Рохтымова ханшам потар

Нид муниципалитет грант ох сытсат

Нид ямальской муниципалитет мув сыддад дэщатты ораңна грант ох сытсат. Щит Ноябрьск па Губкинской васцан, Ямальской па Дорвош районцан. Дув туняд ропатайдад ямас эттасдад.

Касң муниципалитет сытты охлад мет масты верат педа китта веритдаддад: вуд васат па ай похлат васхулет дэщатта, ашкодайтна, леккар па кас верты хататна ремонт верта, касты харатна па хатд сыс щутщаты хататна йидап пормасат лотта, ар нявремаң хаттэдат хатна мата па няврем онттады нэңхэт квалификация вудамтта.

Щимащ ох нятапсы маты

ораңна экспертной комиссия верса, дув алңедна Ямал мув губернатор Дмитрий Артюхов

лайд. Мет ямас дувидад эттам муниципалитетат Росстат онтасна дырамсайт. Щиты, нэңхэт



ясанна местной самоуправление онтасна ям олапсы 71% эвадт 75% маса энмас. Мет ямас щит Надымской, Ямальской, Пуровской районатна, Губкинской па Муравленко васнанна ныда.

Йидап хат аматты тахайна алңищ Пуровской район этас. Карра хат эвадт йидап хат педа мета маса хаттэд Дорвош, Тазовской районнан па Пулнавт васна касадсат.

Тамхатд ки вантман, округ хут муниципалитетна — Пулнавт, Ноябрьск па Пуровской, Дорвош, Красноселькупской, Приуральской районатна — мет ар йидап хат верта питса.

Вера Лонгортова хансам потар

Ашкудайн утадтыты няврэмат сертификатан масайт

Округев хуват нядсот педа нядъян няврэм Хон мув удты вузатан утадтыты уранан сертификат шитты верэд уд. Пулнавт вош ашкудаятан янмет, ихосьянмет классатан яма утадтыты па олимпиадаятан касты эвет, похат образовательной сертификататан юкантсайт.

«Гению Ямала» утадтыты сертификат — сит округеван дэсятам проект, 2020-мет тад эдты округ кусяев онтасан этас. Яма утадтыты, экзаменатан па олимпиадаятан мет ар балл шитты няврэмата маты нётопса.

Сохаптаты охад нийдъяң йи сёрс содкувая хойд. Сертификатат каматса предмет хуват ортсайт: обществознание — нядъян, физика — хутъян педа яртъян, математика — нийдъян, информатика — нийдъян педа няд, химия — ветъян педа ит, биология — ветъян педа хут.

Кашң няврэм олимпиадайн касты порайн, маты предметал элты мет ар уйтас, яма рупатайдал верас, ар номас па юр понас. Яма уталтыты верэд, аңкидаласидал, уталтаты хоятдал нётопсайт па едды уталтыты даңхаты онтасан, иса яма тыйл.



Вуды леккарата аршак рупата

Округеван дойты хошам хатдат вуды леккарата аршак рупата вердат. Там йисан таддув хошма йисат, ар пелак тад сыс хошам хатдат дойдат. Си онтасан вой леккарат рупатаел тови эдты верты питсядэд.

«Хасям вет-хут тад сыс, симась хошам пора дойты сыс, рупатаев товийн верты питсядэв, курк, ай кер тыдасьнан эдты. Хошам хатдат сыс войт ар хощдат, си онтасан мунев аршак рупитты мосад. Дун сыс кум ант шитдув.

Округев хуват хошам пора эдты ар сыр ядап нёңхад этад. Си кутан ядап вой мушат. Хошам мув эдты ёхтыдыты войт камн клещ вой тудат. Си тумпийн там мува тадты юхат, торнат, муват пидан ёхатдат. Якутия муван си войт онтасан ядап вой хонсяпса уд. Вудэт пидан рупитты хоятдува си верат вантман тайты мосад.

Ямал мувеван клещ артаншак сэма хойты питас. Си едпийн ант ныса. 2021-мет тадан Кунавт заказникан лась тыхад уятса. Катра дув муң мувева пошах ант поныдыйс», — ЯНАО ветеринарной служба куся ху Евгений Попов ясаң верас.



Хот омасты программа этал

Ешауд Арктика муван аренда хуват удты хот программа этад. Си проект «Дом. РФ» компанияйн дэсятда. Нядсот удты квартира регионат кутан ортты мосад. Си хотатан нэман вохты специалистат удты питдат.

Хон мув Минвостокразвитие куся ху Алексей Чекунов ясаң эдты: «Дом.РФ» компания куся даңкар ху Виталий Леонтьевич Мутко хон мув кусяя ясаң верас, Арктика регионата хасям хотат ортты.

Ешауд си тахаятан ядап программа па этад, рупитты хоятат вохты рахад».

Там проект ин туп Дальний Восток хося рупитад. Ин сита ядап хотат омасдайт. Ихосьяң сёрс удты хот рупитты вохты мохета мада. Туп рупиттэд сыс хотдадан удты верытдат. Кашң тыдась ох сохаптаты мосад. Худам тад сыс си вера 3,4 миллиард содкува эсадда.

Па регионат кутан округев мет одна си программа хуват рупитты питад. Туп си вер уранан ходна ядап хотат омасты мосад.

Хонщапса эдты хурыяты

Кашң тад хон мув хоятат грипп па ОРВИ мушан кашаңа ювантыдат. Хасям дапатан округеван ОРВИ хонсяпсайн 4 438 хоят кашитас. Ар пелак няврэм, худам сёрс модтас. Сот хоят леккар хота понтса. Дув кутэдан дапатьяң йи няврэм.

Тыдась модтас 162 сёрс ун хоята портун понтса, няврэмата — дапатъян сёрс. Леккар хотан рупитты ёх ходна сот нядъян сёрс хоята портун понты вер тайдат.

Кашң сусан хоятат грипп эдты портунан пондайт. Хоятат леккаран си хонсяпса эдты портун понты партдайт. ЯНАО водаң эпидемиолог Людмила Волова ясаң эдты: «Кашң тад портун понты хоятдув вирус штамм мушан такан ант хосьдат. Ай няврэма хут тыдась эдты симась портун понты рахад».

Ямал мув хуват леккар хотан рупитты



хоятат хоятдув шавиман тайты партдат, портун понты вохдат. Хоятат леккар хотатан даваддайт, ханшдтантыты ант мосад. Си тумпийн леккарат хоят рупитты, няврэм удты тахаятан портун пондат.

Мушитты ки питсясты, мохты леккар хота яңхаты, шавиман нынан таяты, ар хоят удты тахаята ад яңхаты.

Альбина Тырлина ханшам потрат



Хус вет тал постасат

Хащам ятан Канащ похал ашкуда пуншам пора эдты хус вет тад постаса. Щи хатд шоши няврэм утадтаты хоятат, уталтыты няврэмиет, вошаң мохет ун емаң хатд постасат, ар мойдапса ясан худсат, амтана пора хайсат.

Канащ похалан 2000-мет тадан ядап ашкуда пуншса. Щита няд класс эвет, похат уталтыты питсат па ай няврэмиет хатд сыс шавиман тайты питсайт. Щи порайн катхощъян ай пошхие па нядхощьян няврэм одаңмет класса ёхатсат. Ши пора элты куртан няврэмат худам тад эдты тохи янхты питсат. Щиты, ванты, ашкудая янхты доват няврэмат па воша тутдыты ант мосад, ай апщидад ищи хатд сыс ун хоятатан вантман тайдайт. Щи пуляң антилал па ащилал, няврэмлал эдты дэваса ант нумасман, рупитты верытлат.





Ашкудайн няврэмат кеша муй иса ядап щиран верман удда. Няврэмат нэтбук хуват уталтыты верытдат, интерактивной сохдат классан лэшатман уллайт, «Колибри» нэмпи нёхты хоран мутра тайдат. Нэпек шавиты тахайн умаш, ар ошан нопсан ханшам нэпек дуңатты рахад. Щиты Канащ похал няврэмата каш па ям уталтыты.

Щи хатд Пулнавт куща данкар нэ Тамара Булгиева па Пулнавт Дума председатель Вадим Кугаевский ёхтылыснан. «Ма там хатд ястаты даңхадайм, хорам, хошам ашкудайн яма

> уталтыяты, ошаңа, нопсана юваты. Уталтаты хоятата ун пумащипа, дув рут мирэд щиратпищат нумман, няврэмийдад ядап удапсая утадтадат», – Тамара Булгиева ястас.

> > Валентина Рохтымова ханшам потар

Ухал еңк хуват ал шушилыяты

Ищкия йиты питас. Мув донщан лап лаңкса. Хой ёханатан щуңх туда. Ай туват, дорат еңкан лап сухтасайт. Еңк ходна щах ухад, тынаң кев хорпи, туп пурамда мохты шукадад.

Округеван хоятат йиңк хоща атом сорма ант питтэд уранан, еңка этты ант эсаддайт: Натаң районан ай тахайт потты тылащ хусмет хатд эдты, Ноябрьскан

ай тахайт потты тыдащ хус оданмет хатд эдты Ас потты тылащ хольманмет хатл унты. Новый Уренгой вошан шоши активистат няврэмат пидан ухад еңк эдты потар тудат.

Хой ант худантад, ветсот содкува эдты щёрс ветсот содкува унты штрафан мада. Хой няврэмдал еңка охаддат, ищи щи ураңан ох маты питдат. Машинайн ёханата манты ёх,

кат-яң щёрс содкува артная питдат.

Ин турам мелка, ёлха ювантыйд, еңк потыдыйд па додлийд. Щишан хун йиңка манты эсалты пос шиядалты, тохи ад манаты, па юш хуват шушаты. Еңк хун ухал, ныда, питыя вантасал, пурантты порайн херыйд.

Еңк ищипа шукадас ки па хоят йиңка питас. Мосал айлта куншолан лакки шаншман, еңка нох хуңхты. Еңка хуңхты юпийн, ваңкман ёхан сыда манты. Ёхтам юш хуват сорам тахая аядта ёхтаптантыты.


Ииңкат яма потты унты дыддан шавиман таядан, еңк хуват ад шушидыяты. Няврэмдын вантман таядан, ёханата хататдыты, хухатдыты ад эсдадан.

> Валентина Рохтымова ханшам потар





Там QR-код хуват донаты па вантаты, муйсыр нётопсайт СВО хоща удты мохета мадайт. Щи тумпийн нэңдада, няврэмдада, аңкидада па ащидада ищи нётопса вуты рахал.









Иван Эдуардович Сандрин

Хоты там водаң уйтантопсаята пидтащиты рахас, щит эдты Иван Эдуардович муңев ясаң верас. Номас понтсам там вер эдты ханшты, дудан, муң энамты няврэмдув ант падман па едэмаман манты уйтантопсаята, касапсаята ищи ат яңхидыдат, мосты нэпекат китылылат. Йи пуш ант ки тыйл, кимет пуш па вуратты мосад, ёш ант эсадты, лик сох ант тайман па едды хатты.

– Там «Общественной дипломатия ашкуда» тад шуп модтас ус. Мет одаңан, хой дытас, верытас заявкайт верты. Щишн ма там тадан курк тыдащан мосты нэпекат китсам. Худамсот хоят щимащ заявка версат. Щи китам мосты нэпекат онтасан муң видеоконференция щиран уталтысув, худатсув. Шимдаң рут мир хоят щиран законат худатсув, муй щиран па хоты мир мув доватан уддат. Россия мувеван

Едды вуратман па уталтыман улты мосал

Мосванан ханты мирэв эдты Иван Эдуардович Сандрин «Овс мув шимдан мир хоятат. Общественной дипломатия ашкуда» нэмпи программа хуват Москва воша янхас. Щий пидтащийм худамсоткем хоят эдты нийдхус пирыса яң регион эдты.

хоты ищи шоши хоятдув уддат. Каматса тылащ щиты дистанционно уталтысув.

- Щадта па аратад веран хоты манты питас?
- Оданмет этап етшаты юпина тестирование верса. Дувед ханшсэв. Щи щиран ныты питса, хой ямашак ханшсалды, хой атмашак. Щи юпийн ныты питса, хой едды утадтыты питад. Ущ тыдащ кеша хольман хоят тохи питас, хольман педа вет регион эдты.

Кимет этап манам порайн муң Емвош муван актащисув. Мет оданан Сургут вошан. Щи юпийн Ханты-Мансийск вошан. Щита дапаткем ищи уталтысув, усув, вантсэв, хоты Ёмвош муван шимлан мир хоятат кеша нётопсайт закон щиран вердайт. Хоты щита шоши хоятат уддат: хой вуды энмадтад, хой худ ведад. Щадта кимет уйтантопса юпийн итоговой тестирование ус.

Емвоша янхмев юпина щи тестирование версэв. Кашң хоят интернет хоща личной кабинет тайд «Общественной дипломатия ашкуда» сайт хоща. Щишан щитэв ханшмем юпина ма па едды питсам. Щи юпийн нийдхус хоят едды мантсат, финала. Финал – щит худмет ят ус. Там сусан муң Москва вошан актащисув. Щёхар тыдащ 28-мет хатд эдты ай тахайт потты тыдащ 8-мет хатд унты щита муң ищи утадтысув. Уншак тахаята тутдысаюв, хота законат дэщатдайт, хоты вердайт. Министерство иностранных дел хоща яңхсув, щита потарсаюв, хоты ООН хоща шимдаң мир рут хоятат удапса вантман па сайдаман тайда. Муй хорпи нётопсайт мир доватан верман уддайт, щит эдты иса мир доватан потарда.

Щадта «Дом народов Росси» хоща тутдысаюв. Щи юпийн Российской Федерация хоятат удапса па дыд сайдаман удты аппарат хоща янхсув. Щалта Федеральной агентство по делам национальностей хоща па тутдысаюв. Водан вошеван «Норильский никель» водаң рупата хот уд, дув ищи шимдаң рут мир хоятат пидан рупитдат. Ищи ун онтас вердат. Артан щит Таймыр мир хоятат пелак нётопса тувман уддат.

- Модты тахаятан па усты?
- Арпелак тахайн уталтысув, дув кутэдан МГИМО хоща. Уталтасаюв, хоты мосал ар хоят едпийн потарты, хоты нэпекат туңа-щира дэщатты мосдат. Хоты мосад потрэмиты. Хоты мосад дэщатыты, хоят едэмда ки. Мосан потарты ант верытад, ант хошал - щиты уталтысаюв.

Юхат ищи ун итоговой тестирование ус. Щи щиран йи хоят нох питас. Кузбасс эдты, шори нэмпи шимдан мир рут хоятат эдты - Юлия Уварова. Щи тумпийн нийдхус хоят даурета этсат. Дув кутэдан ма ищи щий питсам. Образовательной сертификататан мойдаптасаюв. Щишан щи сертификат щиран рахал едды уталтыты, посатты. Щиты ма уталтыты янхсам.

- Муй дудан наң энамты няврэмдува ястасан?
- Муң шоши энамты ёхлува, хантылува ястаты вутщидам, едды ат вуратдат, едды уталтылат. Ин там йисан ант ки уталтылан, едды хоты удты питдан? Иса утадтыты мосад. Хой айшак, хой уншак хоята – иса уталтыты мосал. Ядап нэпекат дуңатты, ядап законат дуңатты – муй щиран рахад удапсаев кенашак верты. Хоты муң ванан удты хоятдува нёттыя. Хой уншак институтан уталтыйл, хой общественной рупатайт щиран едды манад. Щишан хой едды щиты нумасад, нохдышак вуратты нётоп шоши хоятдада верты, мосад едды утадтыты. Ант ки уталтылан, хоты едды мантыя? Щишан, энамты ёх ашкудайн яма ат утадтыдат, щадта колледжатан, институтатан. Едды ат нумасдат.

Аллина Тоярова ханшам потар



мирад удапса этадтад

Югра муван финноугорской писателят уйтантопсайт пора-порайн верыдыдайт. Щита мойн ёх киникайт лунаттыя хоятат пидн сыр-сыр умащ па хорасан уйтантопсайт дэщатдат. Щинанща ма щи ёхдам кутан тыедтохед янхтэм щиратн, арсыр айкедат актыдыдам.

Йи порайн айкед вуйм хоятат кутан блогера улты нэ Лилия Николаевна Широбокова манэма ликмас, щитэмн ма дув пидэдн потарсам, инщассэм, муй щирн ин там йисн рупатаел верлат.

– Лилия Николаевна, мата таха эдты наң тамащ финноугорской писателят уйтантопсая ёхатсан, муйсыр умащ па наңена мосты верат тата шияласан?

– Там кутн Кекоран вошн Юкшебодинской районан Удмуртия Республика мувн хоттэл ёхлам пилн ши уллам. Мин кинамтак ийикем пидан удмуртской активистата дуңтасдаман. Муй ураңан мин хощаеман щимащ вер тыйс? Мин худам няврэм тайдаман па энмаддаман. Дув ходыена яма удмуртской ясңед тайдат па ёдан иса рут ясанан дув кутэдн потардат. Щи киньща муң хоттэл ёхлув кутн щимащ постапса вусув - ёдан туп удмуртат ясанан потартыя. Итухад кутн няврэмат ашкуда муй садик эдты ёхатдат па рущ ясанан арсыр айкедат вертыя питдат. Мин ийикем сакңан щи порайн дувидал ядпа муң рут ясңева кератдаман. Ванты, муң мирэв ясаң ёрэматыя ант рахад.

Ма уятлэм, хоты наң хащам тадатн интернет хоща арсыр айкед ханшдан. Муй номасан наң щи рупатаен верты питсан?

- Ма, рущ щирн ки ястаты, щит социальной сеть тахаятн блогер нэңа уддам па рупитдам. Щи едпийн ма «учитель удмуртского па английского языков» щирн Удмуртской государственной университетн Ижевск вошн уталтысам па 2013-мет талн щитэм етшаптасам. Щадта кат тад сыс ма вошаң ашкудайн айшак классата яңхты рущ няврэмат английской ясңа уталтаман усам. Щи вер тумпийн, одаң



Юхат хоттэд хоятана йисам па Кекоран воша икем хоща удтыя мантсам.

Мет одан пораятн ма ищиты щи вош ашкудайн няврэмат удмуртской ясңа уталтаман рупитсам. Хун па няврэмана йисам, щит самозанятая нэ щирн ма иса интернет хуватн «ВКонтакте» тахайн рупата манэм мощатсам.

- Лилия Николаевна, муй щирн наң интернет хуватн хоятат пидн рупитдан?

- Ма «ВКонтакте» тахаем хоща арсыр манэма мосты ай- кедат ханшдам, хота ма мирэм хоятат иса удмурт рут аңкет-ащет дув няврэмдад пидн ищиты кашң

пуш туп дув мирэд ясаң едды тусат. Щи вер ураңан арпелак айкедат ма иса рут ясаңан вердам.

Ма, ванты, филолог нэ щирн уталтысам, щи вер ураңан, муй щиратн ямашак кашң ай па уншак айкед туңа-щира ханштыя, дудан хоятатн оша верса, иса япсыена уйтдам.

- Муй щирн па ин там ёхи хащам пораятн наң блогер нэ щирн рупитдан?

– Ёхи хащам пораятн ма шеңк ар тыед-тохед сырсыр мирхотата яңхидыты питсам. Хота ияха актащам хоятат арсыр айкедат вердат, муй щирн там кутн финноугорской мирата рут ясаң, литература, удты-ходты щирдад, культура вердад едды тайтыя па нэмодты щитат эдты ант ёрэматыя. Щи верат ураңан айкедат акатдам, иса ма «ВКонтакте» тахаем хоща хоятата туса нох ханшдам.

Лилия Николаевна Широбокова

- Лилия Николаевна, тамащ мувтэд финно-угорской писателят уйтантопсайт мосдат муй анта нацена, муйсыр он- тас дув арсыр хоятата тутыя верытлат?

> - Ма щирэман, тамащ киникайт ханшты ёхат-нэңат уйтантопсайт шеңк щи мосдат. Тата ияха щимащ хоятат актащидат, мата ёх анта туп дув рут ясңед уятдат. Дув щи рут ясаңдадан па рущ ясаңан сыр-сыр дуңтарат муй умащ потрат ханшдат. Тамащ финно-угорской мир писателят уйтантопсайт мосдат!



Финно-угорской мир писателят Сорханд вош библиотека хотн.

В.Енов ханшам потар

Там лопасан Зинаида Васильевна Шиянова (Кельчина) ханшам арат пондув. Дув Дорвошан уд. 2010мет тал элты арлал ханшты питас. Аңкеда, энмам мувада, ханты нэңата, рут яснала постаман уддат. «Дорвош ёх» арыты группайн па Галина Артанзеевайн ардад арыдайт. Там пуш йи ар ханшас. Яха хольманкем питал.

Ма Дорвош нэ

Ма Дорвош нэ тус арыем,

Ма Дорвош нэ яснем так.

Эви ма щи уртылэм

Ясңем ки ханаптал,

Потрэм ки ищи рахтал.

Тыдащ эви ид хун вудэм,

Хатд эви ид хун вудэм.

Едан шушты ям нэңие,

Кат ёшемна ападмадэм

Ям ясанна ястылылэм.

Верэн щира ки питад

Турам педа пойкащия,

Тыдащ эви ант мостад,

Хатд эви ант мостад.

Щита удты ям нэңие,

Ям потарна потардэм.

Эви ма щи уртысэм,

Яснем щи ханапмал,

Потрэм па щи рахмал.

Ям ясанна ясталэм,

Нопсал кертылылэм ма.

Ма Дорвош нэ тус арыем,

Ма Дорвош нэ яснем так.

Хатд педа порыдыя.

Ма Дорвош нэ тус арыем,

Ма Дорвош нэ яснем так.

Ещал йиты ям эвие.

Арыев век ант сохнылыйл

Ал па танха метылыйс, Ал па даварт удыдыйс. Шит манэм хун ястылыйс, Щит манэм хун потартыйс, Арыман, няхман удыдыйс.

Лухпаткурт

Лухпаткурт пад рэпием Лухпаткурт ун рэпием. Пухар ёхдан ай куртые, Пухар ёхдан щуняң мув. Эвидад, похдад тыйм курт, Эвидал, похдад энмам мув.

Нави Юхур хидыет, Пухар Кущта хилыет. Ин там тата дарытэд, Ин там тата хатмитэд. Дорвош имиен ай хидыет, Нёрпса имиен ун хидыет. Ин там тата дойтэд, Ин там тата карытэд.

Лухпаткурт ун рэпие, Лухпаткурт пад рэпие. Пухар ёхдан ай куртые, Пухар ёхдан щуняң мув. Едды-ёхды мирад шуштад.

Ханты ясңен каншилыйи

«Вуща удат!» ханты ясаңна Тусан нюхмидытэв муң. Хоты номасна нумидытэв, Ханты ясңев ханятымев. Ардув, монщдув уштыдымев.

Ин ям пора щи этмад, Ясңев едды туты партда. Туп па ходща адэмитэв, Туп па ходща мощатытэв Тапалтам ем ясциев.

Ун ащилув, ун аңкилув, Акидув па имайдув. Аңкиилув, ащиилув Ардал, монщдал патан тувмел Йис потардал века уштылымев.

«Пайм удат!» ханты ясаңна Тусан нюхмидытэв муң Муйкем верытлув, ясңев каншилытэв, Муйкем верытдув, яснев актылытэв, Сора кеша, сора кеша, сора кеша ясталув.

Водды ма

Ай Дорвош нэ хонат иты, Дорвош курта опсатмад. Худам ёхан тайд эвадт, Худам мень тутдымад.

Водды ма, водды ма, Дэдамтымем водды ма, Водды ма янхамтымем.

Ун мением Пул ёхан нэ, Хув охсохан нэние. Пул ёханэн йиңкал путы Йиңкал путы, худал путы.

Щаня ёхан тайд эвадт Тус мение тутлымем. Щаня ёхан - кеваң ёхан, Кеваң ёхан - щуняң ёхан.

Ай мением Кунавт нэ, Вурты охпи нэңие. Кунавт ёхан хуват, Саңхамкурта водды ма.

Худам ёхан таиемна, Ям хоятдам щита удтэд, Ханмиидам щита удтэд.

Арыев хун сохныдытал

Арыев ки арэмитэв, Потрыев ки потартытэв. Удапсаев монщ иты монщидытэв Эвина, похна ант худыдыты Нэңна, хуна ант уйтыдыты.

Сама мосам анкие. Тус ёд ёнтам аңкие тайидысув. Йинтпиед, картдуйд ёша катдаптыдымад, Кешиел, сохлыел ёша мийилымал,



Ясңал такан ястылымал. Юраң нэдан дойидытэд, Худам ху юр сутыед, Ёшна такан катлытэл Муед эдты ёхи дойтэд Муед эдты ёхи хащтэд.

Арыев ки арэмитэв, Потрыев ки потартытэв. Удапсаев монщ иты монщидытэв Эвина, похна ант худыдыты Нэңна, хуна ант уйтыдыты.

Дорвош дорэв

Дорвош дорэв ям пунадна Дорвош куртэв опсантымал Ай Асэм, худаң Асэм Водды дув мохтэд щи овидытал.

Дорвош дорэв вутан дорэв, Дорвош дорэв йиңкад восты-восты, Дорвош дорэв емаң-емаң.

Катра йис пора хуват Ойна, щуняна удты партыдымев. Емаң мувев нуптал одтыдымев, Дорвош дорэв шавидымев.

Емаң дорэв пойкидытэв, Ун дорыев порыдытэв. Едды яма удтыя, Яснев хува тутыя.

> Зинаида Шиянова ханшам дуңтарат

Аңкием дыд шув


Питлор ими ям аңкием, Тус арна ма арэмилэм. Вет няврэмал энмалтымал Сутыед ид ат ханятымад. Рупитты тармат рупитымад, Тус ёдыед тус шеңк удмад.

Аңкием дыд шув венша ёврамтымал, Аңкием дыд шув хошам удмад. Самиема эвтасымал, Номасна нумман таилылэм.

Кен ёшна охием вощхидымад, Веншем мосман мосадтымад. Кат ёшна такан ападтымад, Самаңа манэм энмалтымал,







Кати

Пуращ ики ийимед пидна осңан. Кати тайсаңан. Имоса порайна кати орна хонтас. Ор хуват хув яңхас, ван яңхас — щиты яңхтад эвадт сус ёхтас, ищкийи йис, дув па щиты щи яңхал, хасам вус кансад, хата лолан ханемата. Щиты, ор хуват сосыдыман, щищкурэк сыядас па лавад:

- Сус ёхтас, ищкийи йис, ядап хат аматдаман.
- Ма ант дытдам. Мала ма хат пидна верта питдам? – щищкурэк лавас. Ма хата аса ханя таха мощатдам.

Кати па алңищ манас. Хув таңха, маса ван ор хуват па щиты сосас, сосас мус посах уйтас.

- Эй, лохсые, юх хат аматдаман.
- Мала ма хат пидна верта питдам?
 мус посах лавад.
 Ма пам пук дыпина тэхал вердам па щита ид хойдам.

Кати па ор хуват сосыдыта манас. Хув таңха, ван таңха щиты яңхас, лав посах уйтас.

- Лохсые, хат вердаман-са.
- Мала ма хат пидна верта питдам?
 Ма хата аса лайта веритдам, лав посах лавад.
- Щиты ки, кати лавад, мандам па отща хат аматдам.

Хат верта питас. Хат амтас, юхы лоңас, кор эдты хоңхас па ид хойс. Тад ёхтас. Кати каврам кор эдты хойд, хасмадтыйд. Имоса порайна, холантад, хой ки щи йитад щатд. Ув хощанна лайс па, инщиста питсадды, — щи эвадт, щит щищкурэк ёхатмад.

- Ма патта питсайм! - щищкурэк увад.



падтамас па мойпар хоща нёхамтас. Мойпар па кадаң парты вай китас.

– Яңха, инщисы, хоты педы хат коща нэмал.

Кадаң парты вай щита ёхтас.

Щищкурэк, мус посах па лав посах – аса ув хоща щиксат.

- Ад лоңа, ад лоңа, кощаю нох вердад па веддайн.
 - Лаваты, кощайн нэмад мала?
 - Муң кощаю Кати.

Кадаң парты вай парта ёхтас па мойпар эдты лавад:

- Дув кощаед нэмад Кати.
- Итта манду па кадаң ведду, мойпар лавад, кадаң мощатду па Кати майдата вахлэв. Мантсат. Нид кадаң мощатсат. Мойпар додмах педа лавад:
 - Яңха, Кати майдата вахы.

Додмах манас. Ёхтас, ув нох пунссадды па лавад:

– Нын кощайн муң хощев майдата ат йил, давалдэв.

Лав посах кати вератсадды.

- Мойпарна майдата вахлайн.

Кати кидас, соматлийс па айдта манас.

Ёхтас. Мойпар па юх эдты хоңхмад, кати эвадт падад.

Кати дыта питас. Дыд па увад:

– Мяу! Мяу!

Мойпар додмах инщисдалды:

Наң рущ ясаң хасдан, мостадан, мала дув лавад?

Додмах лавад:

- Сымад, сымад! дув лавад.
- Ма наңен лавидысам, холна кат кадаң ведта масд. Итта хоты минэман юхы щи лылды.

Кати нох лайс. Мойпар щи курамна хощ падтамас па юх нув эдты тохы корыйс, щита щи парас.

Кадаң парты вай па додмах пидна орна хонтсаңан, щита щиты щи уддаңан па яңхлаңан. Щи.

Вера Лонгортова дэщатсадды



– Манэм юхы эслы. Хой ки наң хощен щикал, ма увта па порщантта питлам.

 Ма наңен пидаңни хат верта вахмемна, наң ант йисан!

Щиты дын потартан эвадт, вантданан мус посах ув сорна нёхамттад ныда.

Эсды манэм! – мус посах лавад.Хой наң хощен щикад ки ма увта

питдам, щикантыта. Кати лавад:

 Ма наңен хат верта вахмемна, наң ант дытсан!

Щи курамна лав посах ёхтас:

– Эсды манэм хатан дыпина! Наң хощен хой щикад ки, ма порщантта па соңхантта питдам.

Кати лавад:

– Лоңаты, лоңаты мохет.

Юхы лоңсат. Хув маса ван щиты осат, имоса порайна увед щи пунсантта

Щищкурэк инщисладды:

- Хой щита?
- Ма, додмах! Эсды манэм.

Сытаман, сытаман, хат коща хойд. Нох ки вератдэн, веддайн. Додмах хощ

«Акань» ханты нявремат йис енттыт

Ханты щират-пищат щирна верам акань йис эвадт ты маса ёхтас. Няврематна омщадаман тайда, вуд нэңхэт номасна па дув алам савийд. Казым па Ас сыдна олты хантэт, Овс мув охалят хоща нэмал «акань», Юган хантэтна па «пакы» адщида.

Карра касң ның няврем хоща тадаң хаттэд акань сыядата рахас. Ад исна дув щиты версат: камн нэңху эвалт семьяйл ол, щи арат акань. Дув орңидадна щит анта топ ентапсы, олапсы ос. Йис щирна ки эвалта, щимащ ентапсы ның няврем ораңна дув хаттэд вертад порайна ой туд.

Акань кат щирна верда, щищкан эвадт ёвартта рахал па тохлаң вай нёл эвадт. Весна хонты харты ант дэщатда, карра щирна ки, венсан акань хоща куль лоңта веритал. Ант сораттэт ораңна ның акань ернасд хоща кат щищкан дэрна йинтда, йи щищкан дэр - ях акань.

Пора йи тахайна ант лайд, там йисна

камн рущ акань ар, эветна ищи ханты сохна соматтадайт. Рущ акань томпына йидап мутрайт этсат: ханы вата пидна яха руватман ищи акань верта рахал па аляпна аляптата.

Там лопасна муң нынан камантсы акань хор акатсу, вантаты па омащдыяты.

> Вера Лонгортова хансам потар



Газета «ДУХ АВТ»

.:X:3X:X:3X:X:3X:X:3X:X:3X:X:3X:X

Адрес редакции: 629003, ЯНАО, г.Салехард, мкр. Богдана Кнунянца. д.1, каб.106 (34922) 4-68-63

> E-mail: luh.avt@yamal-media.ru

Учредитель

Департамент внутренней политики Ямало-Ненецкого автономного округа (629008, ЯНАО, г.Салехард, пр-кт Молодёжи, д.9, каб.708)

Газета зарегистрирована

Управлением федеральной службы по надзору в сфере связи, информационных технологий и массовых коммуникаций по Тюменской области, ХМАО-Югре и ЯНАО
19 апреля 2012 года
Регистрационный ПИ № ТУ72-00558

Тираж 1300 Заказ 1405 Полписные инлексы: ПА700, на полугодие – ПР561

№ 43 (1294) Газета вышла в свет 25 октября 2025г. Подписано в печать 23 октября 2025г. по графику: 16.00 фактически: 16.00 Газета выходит по субботам

Цена годовой подписки 88 руб., в розницу не распространяется

Издатель Департамент внутренней политики ЯНАО (629008, ЯНАО, г.Салехард, пр-кт Молодёжи, д.9, каб.708)

Отпечатано в АНО «Ямал-Медиа» Юридический адрес: 629003, Ямало-Ненецкий автономный округ. г. Салехард, мкр. Богдана Кнунянца, д.1, каб.106

Фактический адрес: 629007, Ямало-Ненецкий автономный округ, г. Салехард, ул. Чубынина, д.39A

И.о. генерального директора АНО «Ямал-Медиа» Чигиринова Елена Константиновна

Bepa

И.о. главного редактора Рохтымова Валентина Геннадьевна